



新

影

精

光

吳山張

國
富

北
北
金
銀

笑川先生
鑒藏

星
韜
劉
萬
程




編類運使復齋郭公敏行錄

國子司業鄧善之送

文卿知州赴浮梁任序

人之所遇有意所甚欲而不可必得者豈特富貴利
達哉雖交遊會合亦然余始徵詣 京師為詞林屬
留十年汴梁郭文卿由中書掾佐宣徽院模薦紳間
往往言文卿雅好儒術其為吏慎三尺法而無舞智
深文以徼榮寵且勸余與文卿友而余竟不獲一接
其言論以自快及文卿再調都事 江浙省凡南來
者道文卿之善如 京師時前年冬余還錢唐居相



隣始得以暇日抵掌論說古今醜酒酣謔意歡甚追
惟南北十年會合之艱猶若此則夫疲筋力善造請
以希富貴利達者可必得耶文卿受易於真定侯先
生不間寒暑風雨每讀書至夜分乃寐昔漢儒說易
皆祖田何然學有醇駁嘗愛邴曼容師魯伯魯伯師
施讐史稱曼容之兄漢與兩龔齊名而曼容名過於
漢爲吏不肯過六百石然則曼容學易於進退得失
之道深有得哉初余杜門教授生徒以給衣食一旦
被徵命適四千里交遊慮余有不釋然者余謂友
人胡牧仲曰世之仕者或以出處易其守至於困戾

顛踣爲俗姍笑今吾此行是在周易履之訟曰素履
往無咎牧仲喜曰士患不知道耳知之則居陋巷不
爲憂任卿相不爲榮達乎性命之情而安乎所遇者
也吾子其慎諸今余委瑣無似濫綴通籍牧仲斯言
不敢忘也

朝廷命文卿守饒之浮梁行有日矣用敢以予所得者
爲文卿贈以爲何如也文卿上奉七十之親以孝聞
其學如百川東注不進不止才猷且將大用教子弟
弈弈有詩禮風是皆有足喜者余旣叙次其說善詩
者復歌以繼之皇慶初元正月三日古涪鄧文原序

俞希聖

江浙東南古都會分 省今爲諸道最閭閻鱗次生
齒繁郡邑蟬聯疆理大薇花幙府羅英賢 公來贊
治週三年曾中石磊落塵不染筆底造化春無邊人皆
公退閑取樂我獨仕優仍好學精研六畫見太易深
究四書聚先覺君子之道本諸身措諸事業當過人
上依 孔孟作標準豈但龔黃相等倫先聲遠到浮
梁久竹馬喜迎賢太守朱幡皂蓋人羨榮坐見大名
揚宇宙條風颺暖馬首東折柳爲別何忽忽芝山路

透 五雲上早學爾祖老令公

唐理

江東冠蓋地番陽古名藩土饒貢賦夥民衆獄訟繁
君侯牧昌江高駕朱輪軒五馬雖云榮範之勿使奔
造次差毫髮休戚繫黎元矧茲凋瘵餘所急究弊源
力行盡在我爲治無多言先勞民必信心正化自敦
天無德不報流福建後昆下車與春值花柳正村村
六條布新令五袴歌守恩仁風被閭井芳聲徹脩門
明德期勉旃毋俾物欲昏細侯漁陽政世遠其人存

僧志勝

暄風了冰雪鴨綠生瀟茫梁園宦遊客沂舸之浮梁
維饒作貢土厥篚猶相望黃金不恒產椎鑿成痾創
浮梁實附隸又豈無困亡疲氓易爲德愍此當如傷
細侯古循吏勁氣橫秋霜署曹有聲跡况此百里疆
衣食國之本事必先農桑但知清靜治或可廢桁楊
杯酒韋陶篇博山雲氣長敏手固如此能事在廟廊

唐律

良齋

案牘勤勞自幼年慨然歲晚授韋編姓名亦與廉能
列鄉里仍聞孝友傳政固在寬須盡義民雖常愛必

親賢一言爲汝終身戒好惡無私可與權

湯炳龍

千騎如林發虎林昌江耆老望 公深純將 孔子孟
網常事推出龍龔黃父母心曆日從頭 皇慶遠陽春
有脚使君臨一方小試 經綸手早晚登庸作相霖

仇遠

中朝外省久知名 上選循良治此城編戶歌謠慶
新守升堂問辨駭諸生蘭舟小作臨岐別竹馬懸知
夾道迎從此昌江春水滿與 公心事一般清

陸元德

黃金臺上舊知名 南省彌綸績有成
新被寵恩臨一郡 要行好事慰群情
民將草偃歸風化 德若郵傳刻日程
聞到公來人總喜 兒童竹馬遠相迎

張衢

春餘旬日接年頭 暫駐檐帷上客舟
入境喜迎新太守 按圖知屬古饒州
光分南斗文星會 清接西江瑞氣浮
何況都司曾學相 汾陽家世舊弓裘

史台孫

爲國著龜吏 準繩丹心耿耿玉壺冰
薇花幙次聲名

舊 芝檢香中品 級增竹馬爭來人
似似仙舟獨往 世無膺尋常風浪
雙溪水與月相宜 分外澄

劉鉉

省幙雍容畢簡書 又聞竹馬近前驅
仕優合繼中書 考才大猶分太守符
冰蘖自持甘味淡 綱絲方急俾民蘇
浮梁人已歌來暮 公肯三年負牧芻

施文振

雲氣東來景物明 遠迎五馬動歡聲
素多能事俾時 政久歷要途知世情
棠國將春比州主 茶商說好到都城
大川異日需舟楫 不但浮梁似砥平

仇凡

春風新柳思依依正是衣冠送別時
華省幾年勞
簡牘昌江小隊擁旌旗兒童出郭如知禮
衽席遊山
贖賦詩興起儒宮寬力役斯文一脉賴扶持

屠銓

南省當年上幙賓清名皎皎列星辰
方資廟筭禋新
政又作侯藩撫遠人梁上三刀應兆夢
江東五馬稱
行春雙溪路可通河漢明見汾陽有後身

陳天益

中原名族出汾王仕路軒騰姓字香
卷裏詩篇新歲

月牀頭易傳古陰陽一麾暫寄南州守
萬里遙瞻北
斗光五馬載將春意去濟人不在一浮梁

許應旂

汾陽顯胄冠中州學問文章號兩優
微省當時推
上客昌江今日得元侯事功欲對嚴君問
法度惟從
古訓求老我一羶番水舊喜公分竹解民憂

五言律詩

胡維杓

出守昌江郡香名起省闈春風隨化筆
梅雪照征衣
地沃州應富民淳訟自稀汾陽好苗裔
合早贊樞機

僧可權

蘭省舊聲譽浮梁政又新文風起鄉校教雨及州民
湖上千山月江東萬木春汾陽家世遠吾得見斯人

浮梁姚疇上

知州郭侯德政序

雙溪出東北山中會于城南屬舟爲梁故號浮梁風
氣清激人心易以興起見聞父兄師友誰忍趨不善
者前是弗復論陞州以來民日偷薄富交勢而橫賤
凌貴而譁長少斷斷寢衰於舊蓋有其故矣 侯來
是邦蹙然曰民生之憔悴必爲政者未知所以爲政

民彛之泯斲必爲教者未知所以爲教夫人心之靈
莫不有知一爲利欲之私眩瞽顛倒則不暇察耳於
是自其躬行心得者求之飭己以廉奉法以公及人
以恕朞月之間六萬家之衆疆弗友者畏其神明燮
友者樂其豈弟廼新學廟以敦教養成橋梁以通行
旅躬 三皇之宮醫藥以濟夭死凡 王政之所急
民用之所切知無不爲爲無不力而僞增悖入以言
利剥下奉上以求功則有所不從也大抵爲政而不
以教其弊必尚法制而以忠厚愧耻之化爲迂廉而
不能雖不汨於欲第淹淹不足以有爲廉且能矣鉤

距爲智決裂爲斷則不近人情 侯之政不淪於末
由先教而知所本也廉且能而不過用其才由好學
而進於道也平居見其爲學不務小末遡所從得則
所言所行必稱 侯先生曰事君之忠曰事親之孝
曰脩己治人之要若今之所施固特其緒餘然驗其
中之所存則本領已裕自初政于今五年猶一日公
私義利之間知之明守之固夫然後信其止是而不
遷大學之功亦不過如此日需代未至悵然俾諸生
歌驪駒竊謂仁人君子方其來也如景星鳳凰爭先
覩之爲快將去也如麗日好春惜分繼晷惟恐其邁

是孰使然意思之在人心自不能已已或卧轍而留
或聲歌詠嘆是宜樂道其善且以勸來亦願天下皆
逢元道州使萬物吐氣豈爲一州以幸吾私哉
侯字以文齋扁復古賢大夫有以勤學好問垂要終
之令名者今學者方新其爲文當不止是復初九不
遠復顏子以之而用工在克己若夫見天地之心指
無極以前之象吁未易置吾喙曩獲分燈夜雪弄
天兩九周經世十二會雖老矣江山倦游尚期
相與高步歷覽庶幾疇昔之言延祐丙辰仲秋
士雙溪姚疇謹序

昌江百詠詩并序

淇奧之美武公泮水之頌僖公皆邦人歌
君之善也有善則歌有過則規言之者無罪
而聞之者足以戒詩之義也皇慶壬子
復齋郭侯來尹吾州公明廉惠之政洋溢乎
耳目銘鏤乎心肝同僚和衷以治邦人樂而
歌之紀善政為民謠目曰昌江百詠辭不尚
文事紀其實以俟觀民風者得焉

下車先政闢儒宮不但張誇棟宇雄次第更徭加勉
勸吾身親見漢文翁公初至謂文廟見棟宇損漏即勸誘儒生隨力樂助或修或造

棟宇一新

千古浮梁鎖要津名存實廢幾經春濟川小試為霖
手從此應無病涉人浮梁古以浮橋得名歸附後橋廢皇慶壬子有以競渡致殺人

者以公悉拘管屬龍舟六十餘隻橫江為橋名以濟眾既革競渡之擾因成濟川之功
抑強扶弱凜秋霜落膽姦豪走欲僵金石可銷山可
動毫端未易轉炎涼公廉知豪強侵漁小弱故因事懲之雖關節百端不為動於

是豪強
斂迹

暨官昔日奠三皇幾向槐宮借講堂此日殿庭新壯
觀滿階草碧木苓香前政欲營三皇殿久而未能公營建不日而成而後暨李有所

宗仰舊日惟就
李宮行而已

顛連無告有窮民已沐經 養濟仁凌雨震風嗟不

庇一朝棟宇喜重新然養濟院舊不庇風雨公惻

稅糧置局記年年監局人情與限錢今歲但令甘限

狀里胥催辦反爭先

首夏初秋歎久晴竭誠齋戒禱神靈幾畝甘霖蘇枯


槁好創東坡喜雨亭

往載金糧多宿弊增虧生沒笑談間遠稽舊籍還元

額賴有明公燭吏姦姦吏虛走金糧而十餘碩蓋納

獲其利公命發其篋得其情 遂用舊籍徵金糧額始復

口詞自古出詞人書狀誰知巧撰新不是明公能摘



伏良民冤訟幾時伸公初至獄有留繫未決公疑之 使索書鋪元藁觀之知其入人

之罪冤者得雪

癡民背母賣婚書媒妁符同實證虛州尹判官明似

鏡姦豪無計奪貧愚州民有賣婚書與妻家者其母 不知告於官其子及媒妁皆以

為未嘗與某氏結親母不能自辨幾反 坐郭知州吳州判察其姦斷還元夫

走稅飛糧役不均混殺玉石偽成真設非挨究更前

弊豪猾皆為漏網人飛走稅糧官司屢嘗拘併而弊 愈甚姦豪進產而稅日減善良

退產而糧日增 故公欲挨究也

不畏官刑號潑皮良民往往被侵欺一經痛斷仍書

壁應有翻然改過時

徃歲官糶賣土夫專胥破釜攫犁鋤近來何事歡趨
役工雇無虧食有餘

省委巡爐偶下都米須自糶酒須沽手遮西日行山

轎父老相傳自昔無酒市米小傘肩與雞犬不驚沽

市民犬斃使君羊不學前官責倍償絕彼慚顏懷厚

德易牛仁術笑齊王市民有犬嘗斃前任官羊而倍償至是又斃知州胡羊民願償

之公但令勿畜此犬而已

泮宮冠蓋亦紛紛講課從來只具文聽講近來官與

吏討論渾不間朝曛儒李落成丘經師使吏典及官民子弟皆入李聽講繼燭始罷

怡怡祿養奉嚴君壽旦團栾酒一樽盡日黃堂聞戲

綵不通饋獻畫高門

主首屠兒共協謀撰詞脫判欲植牛色觀詞聽知姦
狀枷令誰能更有效尤

浮梁今歲定差徭太守公排在一朝吏貼今無涓滴

水紛紛浮議不能搖

祇候當年過百人不耕而食蠹吾民州官叱道今雖
少閭里安生氣象春

先尋狀首例相傳被告須償杖子錢事畢衙番仍賀

喜始知今是太平年公以稅錢祇候親身當役故此樊盡革

昌江學校謾多儒經閣從來屬子虛一旦洋洋絃誦

起不惟教養更儲書

庭揭西山戒諭文同僚相與勵廉勤水南水北歡聲
遠惠政何愁不上聞

久矣浮梁不產茶課程歲歲只虛加上司嚴令申難
準姑與均敷有稅家

官窳燒造有專官隳突誅求舊百端不肯瘠民肥貴
勢匠人窶戶近相安

挨究民田久用心奈何都取弊仍循重重改正經三
季始得州家版籍新

墻闕有人招外侮符同誣證火其居燭姦賴有神明

見抵罪分明告者虛

酒課更張欲便民不嫌改正又重新公心如秤何輕
重當使鄉都市井均

殷勤養老復尊賢自古循良此事先况是此邦多善
士崇儒重道已經年

佃有姦頑每負租欺凌田主反相誣裝傷幸不逃明
鑑杖遣終須伏罪辜

上能好禮下興仁解使民間薄俗淳睦族有人捐已
產義田義宅濟孤貧

自刑無賴昔爲常惡黨因之陷善良何事輕生今漸

少黃堂政化洽諸鄉

公事悠悠夜便休從來詞訟歎淹留
圓廳就狀多庭決
狴犴常空少係囚

官長書街號勸農郊行每歲費
迎逢我公官榜衙前散
公老歡然酒一鍾

上義合都居最末當初已自少
科敷近來子粒分他處
快活翻爲第一都

種桑種棗是虛名今出從今必
欲行會見甘棠連蔽芾
綠陰朱實一齊成

仕優而學古來希每日携書下
講帷難弟難兄誰得

似趨庭况復有佳兒

爲政由來患不公能公何患不
明通民胞物與渾如此
六萬人家肯異同

似石岩岩聳具瞻始終冰蘖守
何嚴人言徹底清如水
縱飲貪泉也自廉

整頓昌江百廢興黃雲棲畝歲
秋成從今歲二秋成望
凡有荒閑盡勸耕

流水泠泠山響靜浮雲漾漾絮
浮輕政成儘有絃歌暇
好是言游在武城

公廉明斷徹霜臺走檄移文日
日來拂曉治書深夜

出一輪明月撥雲開

誣告之人罪可誅脅財又復自招虛百端設計殊深

巧一旦傾囊謾貯儲有告廉明乃以鈔所受鈔出虛畏

銀峰昨歲使輶行攬轡觀風獨有聲此日我公兼委

送已澄清處更澄清

五虎三彪洎水謠害民旋復放官刀誰知神政行鄰

境百詭千姦次第消

壽老致政嘉議郭公序

皇慶元年龍集壬子大梁郭翁年七十長子郁文卿
適任浮梁知州奉翁就養由杭往饒固文卿為都事
處也饒之寓士大夫嘉文卿之祿及親榮翁之有良
子以養故咸為之壽且為詩序云詩序者何序所以
作詩之意也序何始詩之作必有其事採者藏者賦
者本其情探其志以為之辭若魯太史克楚史倚相
子革是也斯其未刪時也既刪子夏以教西河之上
門人授業傳至後世專門名家者因其言推其事而
箋傳大小序作焉若毛公韓太傅嬰衛宏又其始也

詩六義此詩於六何當其殆風頌賦乎豳風爲酒介
壽魯頌頌魯侯及其親如松柏之茂又直陳其事
者也上壽一百二十厚祿萬石今茲翁七十文卿五
品三弟仕未貴顯然而固未可以爲詡也詩之序之
者何期翁與文卿及三弟也翁善人能迪子文卿良
子爲賢侯篤師不廢學用能養親揚名予聞善人天
所開學祿在中則翁壽可上文卿三弟祿皆可厚也
詩之序之可也非詡也詩旣著于篇爲一卷士大夫
爲詩者曰永康胡長孺汲仲文宜爲序會有故授筆
弟子寧海舒叔獻吳興張復亨使書其辭以爲詩序

三月辛亥哉生魄序

趙鎮遠壽詩序

皇慶元年春三月 復齋郭侯守浮梁下車即迎拜
迺翁至郡翁年七十以良月初六日慶初度郡大夫
士欣然曰有壽可以待子之貴有祿可以及親之養
人生之罕遇天下之至樂也西漢萬石君四子馴行
孝謹秩皆二千石長子建官九卿君尚無恙史臣美
之翁自大梁來江山景物鳩杖遊歷中原雅致見者
傾盃觴酒豆肉居祿養之榮淑義方之效食陰德之
報翁之壽子之貴相頡而耒艾也侯孟弟應門仲弟

戎職暫假扶侍季弟承宣汴省亦且至膝下郡人將
繪爲慶圖絃爲美詩雙溪生趙鎮遠爲之序

。古風

盱江揭祐民

浮梁刺史初分竹便覺榮親有餘祿異時滫瀡親亦
歡何況珍鮭滿盤足春風黃堂折銀甕香霧浮甌飲
醕醪玉奴翻手生紅雲朱唇清謳嘯新曲就中一曲
胎禽下錦字啣來有華錄賜以鳩杖封以郡矍鑠尊
前鬢雙綠况今兒作民父母唯諾愉怡移薄俗州家
美政報翁知勝於放鶴獻生鹿

潘東明

梅花角聲動江路橘苞棋局留仙霧小寒六日天氣
佳七十翁翁慶初度金章紫綬老萊衣大椿庭下生
光輝人生有祿二千石養親白髮天下稀傳家累世
一清白邦人健羨汾陽宅閉門却掃無車塵菽水清
歡逾鼎食由來平治本脩齊施于有政皆其餘舊家
奮建莫專美公家盛事不一書我來相慶爲公喜把
菊持觴歌兩語願公大兒二十四考書中書而公一
千二百年壽如廣成子

。律詩

錢唐俞希聖

汾陽芳譜與今同壽相家聲有祖風積慶子爲賢太
守稀年人羨老仙翁遙知畫戟朱門處便是瀛洲閬
苑中盛事喜聞還樂道聊憑去鶴寄詩筒

永嘉林德芳

精神久羨地行仙鶴髮方瞳五福全湛露息深金掌
潤德星光聚彩衣鮮翁躋壽域逢希歲兒擁州麾喜
象賢姓字已登群玉府人間那識大椿年

涇西劉恪

人生七十古云稀福壽如翁殆庶幾翠栢蒼松堅晚

節紫袍朱紱映斑衣身宜晚歲逾強健眼見諸孫各
奮飛今日昌江民快樂事三如一斷無違

古涪鄧文原

漢庭太守二千石洛社耆英七十翁隱几心知無物
累同舟人望有仙風香生燕寢爛熳樂祿得腴田滄
澗豐東閣郎君皆可意南陔詩句若爲工

南陽仇遠

曾識昌江賢史君知翁家學有淵源年開七袞方
清健天與諸郎各粹溫華袞疏封榮錦誥綵衣羅拜
壽金樽三陳五寶真堪比自古汾陽是慶門

金華毛翼

家傳詩禮薄羸金汁水耆英七十春長子朱幡初出
守諸郎丹紱各逢辰浮梁迎養圭田沃禁闥催封寶
誥新畫戟黃堂爲壽處愛親錫類及人親

浮梁方玉父

戟門冠蓋集如雲共慶椿年第七旬萬石尊稱良吏
父三牲榮養大夫親洞庭仙橘霜前景東閣官梅雪
裏春珍重郎君朝服侍隔簾驚動座中人

趙鎮遠

兕年富貴已憑熊况有椿庭七十翁紫氣長留香篆

裏紅塵不入酒盃中景星明潤雲霞曉良月陽和草
木風四海一家同孝弟直疑汴水在江東

姚疇

角巾蕭散漢林宗梁苑清芬播楚東六萬家齊呼大
父二千石貴奉尊翁小春紅萼舒晴日晚節黃花立
曉風應祝兕年還似我萊衣此會戲庭中

閔全

公年七十記生初坐看佳兒綰郡符鳩杖迎春香露
透熊輜拂曉瑞雲扶盛開洛社耆英會重展汾陽家
慶圖談笑定知無俗客梅花千樹說西湖

閔齊

郎官官貴擁朱輪鶴髮翁翁七十春清氣中州分月
露祥光南極現星辰黃花對酒有佳色玄塵揮塵無
雜賓祇恐漢庭思用老商顏還訪采芝人

鄭思道

官舍冰清蜜報衙親年希有樂無涯乾坤不老八千
歲父子齊名萬石家簾外秋香浮菊水酒邊春信在
梅花汾陽盛事今重見留與邦人久遠誇

方仁存

有子榮分竹使符黃堂高會慶垂弧浩歌工部希年

句重畫香山九老圖霜滿洞庭留橘隱春生東閣伴
梅臞阿翁爛醉邦君舞此樂湏知古所無

壽詞水調歌頭

姚堅

菊耐九秋晚梅接小春回乾坤好景如此初度笑顏
開湏信人生七十那更公家萬石有子亦奇哉盛事
寫圖畫和氣藹樽壘 汴梁客東滄海北燕臺雙溪
人士多幸鳩杖日徘徊重見汾陽富貴更作渭川勲
業白髮未相催起舞爲公壽瑤鶴下蓬萊

壽詩後序

浚儀李鳴鳳

仕宦至五馬亦榮矣未若祿及其親之尤榮也古人願三釜養親矧貴爲二千石哉分千里之寄任一郡之重垂紳正笏立乎士民之上官可行志祿可及親此不爲榮孰爲之榮必曰仕不至卿相祿不逾萬鍾皆不爲遇此非知道者言也遇在天行志在我苟存心澤物雖一命亦可矣豈必卿相萬鍾爲然使貴爲卿相祿萬鍾矣利澤不加於人名聲不昭於時功業不著於後謂之苟生可也吾意爲其親者未必樂也曷若啜菽飲水不貽親憂者爲得邪孟子論君子之

樂以父母俱存兄弟無故爲一樂世未有知者方多隆名顯爵華居良田出入駟從溢衢路衣綺縠之妾環左右文繡被墻屋芻豢飽僕馬昆弟親戚或操瓢爲溝中瘠有不恤矣奚鄉黨鄰里計哉由是言之仕而至於祿能榮其親詎非樂歟浚都郭侯文卿由江浙行省都司出守昌江致政翁適年七袞四子競爽朱紫烜耀人皆以致政翁積善所致侯又謙虛好學政事精敏宜其仕登顯宦祿有圭田逾於三釜萬萬而侯之諸季仕路方開致政翁之被榮養固未艾虎林之士凡知侯者皆賦詩爲翁壽金華胡汲仲旣

序于前余因識其意於後云浚儀李鳴鳳

章之才壽知州郭公詩

中州淑氣積扶輿碧眼仙人玉帶圍循撫久煩廉叔
度治平新詔尹翁歸庭前的皞三珠樹堂上爛斑五
綵衣留與江南傳盛事梅花笛裏鶴南飛

吳鵬飛

曾騎竹馬候江濱又見黃堂五度春吏瘠民肥千里
治父慈子孝一家仁詞人競獻長生頌畫史偷傳不
老神歷過汾陽令公考却騎箕尾上星辰

鄭蘭玉

水滿雙溪春滿城文星光擁老人星鶴飛曲裏梅千
樹燕寢香中草一庭黃閣未傳新姓字青山猶是舊
儀刑樽前不用呼瓊玉竹馬小兒金字經

俞彥聖

上元燈火又經旬崧嶽當年喜降申雪霽溪山官路
曉春風桃李畫圖新由來天下神仙客定是朝中砥
柱臣但願我侯長不老年年此日慶生辰

操智達

清曉霏霏瑞霧香喧闐蕭鼓慶汾陽欣逢麟紱開祥
誕佇見龍墀錫寵光東閣觀梅吟興遠南州騎竹頌

聲長願傾滄海爲公壽
婉婉歌雲勸玉觴

鄭子寬

今朝崧嶽降生申
紫綬金章天上人
蓬矢呈祥正月
候芹宮樂育五年春
綺羅隱映斑衣爛
簾幙低垂玉樹新
蒲引霞觴稱頌處
從茲眉壽比靈椿

方則芳

瑞靄梅香曉氣新
黃堂笑語慶生申
大賢出際三陽
泰小郡期蒙六載春
臂健調弓飛白羽
心清覓句岸烏巾
汾陽留得家醴在
佩玉腰金侍大椿

姚希愈

坡老身居翰苑年
茲晨重慶左弧懸
首開甲子初春
後近在中和五日前
風動香芹浮半水
雨晴瑞麥際遙天
寇恂借重山州願

玉殿除書萬里傳

尤子巖

燒燈節過恰經旬
四見黃堂紱玉麟
民物俱蒙皇極
福耄倪同祝宰官
身古來多壽惟仁者
今喜爲邦有善人
細讀魯侯千歲頌
宮槐壇杏一般春

尤子勉

竹馬兒童戀細侯
壽觴載祝使君留
三陽暈進叅羲

畫五福朋來備禹疇絃誦萬家春
盜盜蠶耕千里日悠悠狄門桃李多
豪雋長傍公家十二樓

宋則翁

儒宮煥飾甲江東多士名香貢籍中
但願狄門桃李盛一齊噓拂借春風

戟門又慶左弧懸花市歡聲沸管絃
昨夜雙溪溪上望文星輝映壽星躔

七言絕句

操貴持

燕寢香凝瑞氣浮元宵燈火隔旬留
靈椿不老芝蘭

秀待到貂蟬尚黑頭

細侯在昔守漁陽五載承流政績彰
此日聞孫傳郡譜家聲依舊漢循良

坡翁分竹五年中詩興中和萬里風
太守文章多善政宮牆特筆記新功

曉來膏雨總添春垌北洪鈞一氣新
柳染腰金催上色梅儲調鼎辨含仁

良齋先生酌倡詩

良齋先生寄贈

復齋郡侯唐律一首侯以示諸生謹相率用
韻以紀一時師友之盛云

令下能如草偃風民歸復若水朝東是非殽亂由多
欲邪正分明本至公時論已傳今勝昔汝心當以始
要終三年平地爲山了九仞無虧一簣功

復齋使君始至浮梁示予以

良齋侯先生送行詩可謂聽其言也厲今觀
此作亦復如之令人起敬不已二詩當聯爲

大軸傳之天下使凡爲師爲弟子爲學爲政者皆有所矜式豈小補云乎哉皇慶甲寅正月旣望昌溪吳仲迂書于郡泮

微雨絲絲颺好風冷然來自浙雲東乾坤二卦分全易良復兩齋皆鉅公去日當如來日葺先天直至後天終吾民涵詠恩波裏孰識師門講貫功

雙溪方玉甫

善頌洋洋繼國風天球琬琰各西東先生在昔侯師聖弟子當今郭令公講學不離仁知勇爲邦必慎始衷終從知師友淵源正大展真儒濟世功

趙鎮遠

坐挹西湖楊柳風題詩飛寄碧雲東善言千里同聲應惠政三年衆譽公復道有來還有往艮山成始又成終行藏師友曾商訂禹稷顏回各有功

姚疇

師門立雪坐春風別後題詩寄楚東凜凜法言推大匠洋洋善頌屬明公知行本領誠爲貴擇守工夫勇克終更卜勞謙君子吉美歸於上不言功

臧廷鳳

刪後無詩返古風先生筆力障川東聖賢心法神明
易宇宙陽和天地公師訓以規非以頌侯邦知至可
知終行雲待得爲霖了潤澤蒼生不計功

方希愿

朝廷有道振儒風太守聲華曉日東扶起六經尊孔
氏掃除異論本文公 聖人乾健元無息君子謙亨
自有終待得明年歸衮繡籌帷密運策奇功

徐雲龍

楚泮衣冠鄒魯風使君佳譽謁江東疑章盡黜諸家
異議政惟持一字公此日先生高屈宋他年弟子壓

嚴終師門相業香青史千古河汾講道功

宋堯輔

獵獵雙旌舞曉風分符嘉與易俱東畫前欲問庖犧
氏圮上知逢黃石公朋自復來占利徃物從良上驗
成終兩齋同道相師友會見真儒善治功

吳韶發

侯芭學易有家風弟子聲華藹楚東義理七分宗正
叔象占二字取文公來詩展轉無他意苦語丁寧戒
慎終他日師門重相見定應撫手賞新功

章穀

唐律能追古國風緘題遠寄楚江東磨礮德義真先
輩游戲詞章亦鉅公師道何妨相爾汝躬行是必謹
初終他時相業齊房杜始信河汾講學功

昌江方希愿上

復齋說

大梁郭侯文卿治昌江之又明年而與人誦之百廢
具興而民不知役一廉自律而浩然無餒公退以詩
書淑士尤喜談易揭復齋二大字榜其燕寢蓋有得
於涵養之素體驗之餘而非徒誦說云爾侯之雅志
可尚已徵言於予予曰昔人以復名齋朱子之告黃
君仲本者具矣何辭之敢贅抑大傳曰復以自知蓋
以學者各有入道之方得之於自則有難以一槩論
者獨不可求朱子言外之意乎在卦六爻皆以反善

之義爲重而初九一爻在下爲復之最先故謂之不遠聖門獨以剛明之顏子當之千載而下未聞有能當之者豈可無一人至此地位邪抑功力次第之不竟耶顏子之復見於易顏子之所以復則具載論語一書吾夫子之警發顏子者在克己復禮一語而他日評論其終身所到則又曰不遷怒不貳過夫天理人欲相爲勝負戰而獲勝之謂克克乎彼則復乎此此以得力言可怒在物而不遷在己少失於慥而不萌於再此以用力言合二章而觀則顏子之所以復者可攷矣然怒特七情之一何獨舉其一而遺其六

蓋怒難治也一情治則七情俱治舉其所難則可知其所易過與惡異仁者無惡而過或不免先儒謂顏子無形顯之過念慮少羌隨即覺悟然一事之覺何以使百事之皆當蓋其聞一知十之資觸類而長不必件件歷過而春融冰釋自然至此不遷不貳此正顏子持守之驗此顏子所以爲不遠之復侯內重外輕明體適用而學顏子之樂自今涖政臨民則必惕然懼曰彼蠢然無知者悍然弗友者亦天地不肖之子教化得無有未洽乎吾可有忿疾于頑之心乎處已接物又必悠然思曰天下事物之理無窮酬酢萬

變之匪易若然者得無尚有闕乎吾可不盡天下之
議乎復焉執焉之謂賢聖人無復常人不能復復賢
者事也然復非難也復而能守爲難顏子之學正得
於守者如此 侯之復之守余固有以知之矣然區
區猶有望守之益堅行之益力以是道終身可也由
一州而達之天下則四代禮樂疇非時措之宜宇宙
動植咸被無窮之澤侯勉乎哉余客侯館下且三載
茲將會試

京師而侯之得代伊邇少寓贈言之意時延祐甲寅
日南至館下士昌江方希愿再拜謹書

浮梁州建學序

瀕江饒爲大郡浮又爲饒大州人禮樂而家詩書菁
莪采芑有自來矣比歲司牧者不審政本之由廟學
隳圯衿佩挑達深有負

綸綍教養之恩皇慶初元之三月汴梁 郭公復齋
植節是邦政有清白聲歸然獨立下車初首謁
宣聖見舊廟淺窄上雨旁風愀不自安毅然以 宮
墻爲已任知所本矣廼集邦之賢大夫士議而新之
而士亦感奮竭力以從選邦之廉能玉林方直大菊
東趙鎮遠晉齋閔全皆嘗爲郡文學者董其役良材

美器川滄山積工師效良並手偕作充拓舊趾建
大成殿講堂經閣門序廊廡庖湑從舍整然俱備高
明壯麗表於江左故生徒有齋賓客有次侯伯大夫
有脩容偵謁之所召役不驚未暮月而落成昔范陽
祖君無擇知袁州相

夫子舊廟陝隘不足改爲之李太白稱其賢而爲記
愚嘗觀前代記建學者惟太伯之文興起人心維持
世教讀之令人肅然起敬當時守是邦若祖君無擇
亦相與爲不朽視吾 郭侯無媿焉余竊迹儒宮見
聞其實喜而叙其畧以俟當代燕許者筆之詩曰

太守文章間世雄下車首建 素王宮千尋梁棟

霄上一郡衣冠雨露中人喜幘幪皆盛德我驚突兀
有神功無窮美譽留金石今古 中書兩令公

是歲九月一日癸巳前征東省提舉儒學古番潘
東明敬拜書

方玉父浮梁橋詩并引

徽水隨山北來至城南始浮木而度郡之名
昉此舊有橋廢者五十年 太守復齋先生
下車未半載斯橋重興江山還千古之奇人
物聚一時之盛喜甚欲舞情見于辭

重建輿梁古道通溪山收拾畫圖中彩虹冷浸秋空
碧鐵鎖橫施夕照紅擊楫聲傳千里外回淵力障百
川東橋成不假相如筆萬口同稱 郭令公

趙鎮遠

十載成功在一朝浮梁重見作新橋山連海上金鼇
背天掛雲間玉竦腰人自北來行古道水流東去戀
清朝倚欄無盡滄浪意聽取漁歌答暮潮

潘東明

新橋東障雙溪水神遠人稱太守公鐵鎖萬鏐橫海
鷗畫闌千丈架天虹行人穩步青雲上豪客高歌夕

照中我欲醉揮題柱筆爲公磨石大江東

閔全

跨水脩梁古道通溪山俯仰百年中西風畫舫聯飛
鷗斜日紋波飲渴虹揮筆已疇題柱客作舟會辦濟
川功此中快有乘槎便蚤侍香雲一朵紅

閔齊

濟川久待作舟材城郭歡傳太守來古道重興千載
廢群艘宜障兩溪回鯨鯢背負滄波月車馬聲驚白
晝雷草遠沙平官路遠驛亭開到小春梅

余周錫

新作長橋似砥平雙溪水與政俱清玉虹橫卧秋江
冷畫鷁齊飛夕照明野渡已開時宰識輿梁預報歲
功成了無私惠如溱洧鄉校從今諳頌聲

宋則

小試濟川手新橋偉觀成雲浮鼇背穩水響馬蹄輕
驅石疑神助捐犀媿客情江山圖畫裏千載使君名

番易錢章

古稱瀕江之郡惟饒爲大饒之支邑浮梁爲大蓋上
達衢信下逮徽池環山齒萃衆流演迤眈畝滋沃疆
場恢曠民庶繁夥士氣超卓然俗尚勁悍雖民無器
狡而釁隙易開吏乏循良而侵漁無數事務繁劇素
號難治

皇元陞爲中州第彼子男進爲侯伯品秩日穹庭階日
峻而地不加廣民不加多所以任貢以奉其上者無
寧歲幸天厚此邦俾

復齋郭公一麾出守以蘇民瘼其爲政也嚴而不猛

寬而不流不旬月間汚染丕變嘗謂穀祿不平賦役不均則民不可得而治故孟子曰夫欲行仁政必自經界始於是集耆宿諭權奸覈版籍明等色正頃畝復爾減削蠲彼椿配由是稅賦大明毋敢欺誑故堯役有倫催科易集道無餓殍野無逃民簡簡穰穰不知遊衢擊壤之樂其樂也越三年欽承

明詔經理田糧饒之州邑騷然大擾惟浮梁民業按圖供報曾不勞力而侯又蒙被

省檄經理金陵數月之頃報政言還非侯之明敏能如是乎他如重建學宮作養後進佩衿濟濟文風蔚

然其所以宣明教化者又如此新梵宇以上祝

聖筭成浮橋以濟行人創三皇之廟以躋民於仁壽之域皆政事餘力所覃也又能潛心易學以明參天地贊化育之理故能永彙自持終始一節僕番易吳德昭也雖未及識 公有來自浮梁者談侯之善豐豐不休故悉其槩歷五載始得代舟經城下幸承顏接辭始信客之云云者非溢美也於其別故作序以餞之其遺愛在人雖不能枚舉僂數姑據所聞者言之然言之不足復作昌江之詩五章章四句以永歌之歌曰

昌江之水清且淺兮胡不膠侯之舟母使遠兮昌江
之石堅且大兮胡不柅侯之車母使邁兮昌江之民
繁且庶兮胡不繫侯之馬母使去兮舟日遠矣車日
邁矣馬弗能繫爾奚賴矣侯今往只爲雨爲霖願滂
餘潤漑此棠陰

古體

鄱陽周伯顏

昌江美化五載餘民心借寇何渠渠農桑千里爭實
犢冰雪一清逾懸魚寒梅吹香夾道送明月滿載歸
舟虛此行端的繩祖武二十四考居中書

鄱陽徐天麟

相知五載不相識爭說昌江刺史賢自有此州無此
守旣歌新學又新田椿松不老娛朝夕花柳無私閱
歲年食藥飲冰心匪石割蛟刺虎力回天旌旗交餞
人遮道琴鶴相隨月滿船醫國濟川俱善政豐碑會
見爲公鐫

唐律

番禺徐省翁

桃李春風六萬家下車民不識州衙甘棠應有千年
愛美玉終無一點瑕訟簡自隨琴外鶴賦平誰歎缶

中蛇邦人更致攀轅祝歸願新堤早築沙

番易吳旭

昌江分守著能名栢府薇垣盡有聲易究先天含化
育政成五載頌廉明金臺此去應重建竹馬何時擬
再迎好向中書繩祖武大爲霖雨福蒼生

七言絕句

番易蔡儒實

文采風流薇省郎一麾出守惠浮梁作新士氣蘇民
瘼五度春風燕寢香

訟簡徭均吏不欺農桑田井樂熙熙黌宮祀宇郵亭

路盡是邦人去後思
蔽蒂甘棠坐鼓琴文章太守雪霜心喧啾百鳥聞孤
鳳此地月明山水深
萬人祖帳去舟空解組歸朝氣似虹帆到潞河冰始
泮黃金臺上又東風

古詞

百字令

鄱陽朱友聞

芝山如畫五年間多費黃堂心力南國重來棠蔽蒂
壓盡江東春色畎畝堯民水雲楚澤鶴去遙天碧書
船歸後思公惟對周易 月下濯足滄浪笑他漁父

只識磯頭石豈不與懷攀鞚虬馬首髮蒼鬚白人意
綢繆

君恩深重夜看星朝北茫茫煙海浮梁能幾千尺

沁園春

方希愿

畫戟清香綠鬢朱顏當代偉人任宦情澹泊歸舟空
載滿腔惻隱噓律生溫襦袴歌謠佩衿絃誦留甘
棠千樹春昌江上把它年政績寫入堅珉 曳裾曾
客公門只冰雪相看意自真更研朱點易幾回清夜
對梅索句長記芳辰風雨情深江湖興遠咫尺
清光立要津長亭路但相期汗漫上下龍雲

李天應上

秦郵使君

郭公善政頌并序

至治二年公自中書檢校出守秦郵以八月
一日視篆于黃堂至冬末復膺

新命同知兩浙都轉運鹽使司事公在郡半
年廉直清明植善去惡崇尚儒士惠恤小民
其於勉勵學校作養後進用情尤著闔郡城
士民之子弟就學者皆欣欣奉 教命朔望
謁拜

先聖環列明倫堂上下各試其所習以學者

之通否爲其師之殿最以激勸之由是曰師
曰弟子德業咸進高沙昔號多士比益凋喪
今公能興之文風之盛當復自茲始其化民
成俗之功雖蜀之文翁不是過也公撫字斯
民凡可以興利除害者靡不究意固不可枚
舉而指數之惟公將去此而適淑也故士與
民皆惜公之去雖陳辭繾綣而莫能留公亦
恨不果終惠於斯之士與民也雖攬轡彷徨
而莫能止僕隱於客者知公爲政之善敢據
其彰彰者爲頌以餞 公尚異公以欲終惠

於此邦之士民者而施之江浙之士民則彼
之感恩者與此奚以異而區區之期公於將
來者又豈止如是哉 頌曰

猗歟使君博識洽聞旣迪以武復尚以文揚歷膺仕
氣槩邁群惟廉惟直以敏以勤檢校中書慮竭誠據
有紀有典不疾不徐四方具瞻大播令譽策勲上考
牧守是除惟此秦郵事劇民稠實當孔道南北所由
號曰難治公處以優餞往迎來靡不備周公之撫民
寬猛適均肅之以秋煦之以春恩施民懷教出吏循
推誠而行政以日新崇儒尊經庠校以興善者知勸

不能是矜青衿如雲明倫畢登誦聲琅琅是式是承
休沐餘力射圃斯即弓矢既調正鵠必得射夫孔多
惟公是則弭節韞弓以宴以息公臨是邦百穀豐穰
民有餘食官無負糧民歌于道吏慶于倉天哀民寒
一冬恒暘民懷熙熙公心惶惶齋沐虔禱醮陳靈場
玉笈闡秘嘉雪呈祥編氓鼓舞舞歡及鄰疆民之仰公
執熟以風昔之寇恂今之文翁公不可留簡在
帝衷

帝命公往淞江西東煮海潤

國厥賦惟豐漕牧有長 公職攸同迓車在門去意

忽忽公之遺愛棠陰蒙蒙惟棠有陰式慰民心公材
匪他檜栢千尋

廊廟之需棟梁之任匪朝伊夕

丹鳳

德音促覲

嚴宸載驅載駸鼎鼐是居爲雨爲霖鰥生倦遊息羽
喬林祗頌 盛德配古示今

頌畢復繫之以詩

九天辭

冕旒一麾來南陬遙遙數千里駐馬臨秦郵兒童夾

道迎再拜稱 賢侯黃堂視事初剖決無停留民懷
下知畏善政日以優青青子衿輩烝徒楫其舟課試
嚴朔望德業勉進脩勲名慕臯契事業齊伊周美哉
君侯德乃與天者遊

丹宸

眷注隆

國賦勞紆籌促裝向淞右孟城焉可留同握漕使符
指揮數十州秦郵去 賢守老穉思悠悠浙江萬餘
竈坐使恩波流懸知 使君心報
國先民謀

至治三年歲在癸亥正月望前三日翠壁隱者
李天應拜手書于寓隱書房

高沙高方桂餞郭侯詩并序

詩云樂只君子民之父母斯言何謂也蓋

牧民之官與民好惡之心相近推其愛民之心如愛
子之心痒疴疾痛必先知之此之謂父母也嘗讀漢
史循吏傳古人爲牧守之吏立傳乃分循與酷使人
知有循良慘酷爲後世之龜鑑也循吏中不過十餘
人以是知循良之吏不數也中間吳公治平爲天下
一其文翁居蜀常衮在閩吳公他無治政可攷惟有

薦賈生一事而已他日賈生爲漢陳治安之策開四
百年太平之基豈不韙歟文翁常衮閩蜀之間建學
立師以開人心萬世之聳贖此三賢守以薦賢興學
建師其有功於後世者大矣龔黃召杜不過以慈祥
仁愛以得民心漢帝有曰與我共治者其惟循良二
千石乎古人待守土之臣眷且重也我

聖朝一統天下車書萬里普天率土莫非王臣其眷倚
守土之臣惠至渥也高沙居淮之東南北孔道送往
迎來非有通今博古之學劇繁治劇之才則不能也
今太守 郭侯家世古汴簪纓芳裔襟度汪洋智見

高偉深通義易四書奧旨淹貫該博可謂文章詩書
賢守又且律身廉潔一清如水爲政以不擾爲主慈
祥寬厚高郵兩城五鄉受公之惠甚如父母之愛其
子也其薦賢興學立師若吳公文翁常衮續復見於
聖明之世下車以來未及半載忽欽承

宣命就任美除兩浙鹽漕民不忍其去借寇亦無計矣
嗚呼高郵淮海揚州屬邑環以重湖形如覆盎水澤
之國也今喜鴻鴈安澤無流離咨咨之憂則鷺鷥野
鶩聳肩窺食不得伸其喙展其翼蘆花張空無滿意
飛舞於西風中矣叫囂墮突之跡甫息雞犬之寧未

幾柰何天不我與奪我父母不得樂三年治政和氣
之中愚想蘇堤春曉湖山景物必有待其人矣學校
之地大殿兩廡多感心勞近喜落成未遂全璧愚學
校耆儒首蒙眴睐犬馬之齒八旬有一忍對東風以
寫餞行之詩學校拜 公盛德諸生以詩餞別俾桂
序其卷端於是親作親書以爲千里舟中一笑云至
治癸亥正月上元日高沙耆儒玉巖老叟方桂拜手

古體

秦郵郡岸冷掾洛陽劉克敬

賢侯治淮郡五馬生輝光報

國寸心赤憂民雙鬢蒼襟懷抱正氣凜然若冰霜向善
去惡黨扶弱推豪強嘉聲藹千里美化傳一方民歌
五袴謠在處遺甘棠文風日大振弦誦聲洋洋重湖
隔線堤洪流詎能防甃石力欲捍永爲除民殃曠旱
事祈禱瑞雪隨飛揚農夫樂四野文儒詠篇章半載
百廢舉善政真龔黃

丹詔忽飛下榮除復餘杭使節佐均輸

國課湏賢良談笑了鞭笞西湖具遊航吳山麗清曉蘇
堤艷春陽 使君足行樂柰此孫秦鄉無由願借寇
士庶徒彷徨朝來促行色風帆舞牙樯此去豈易留

早願登

朝堂大展作霖手 德澤均八荒

唐律

申屠伯騏

手把州麾秋涉冬傳

宣早出大明宮未成湖上包隄志先試江南煮海功治

行芳名騰墨剡去思遺愛播清風

朝廷遴選循良吏會看弓旗再召公

張礪

秦郵黌舍讀書聲後進英才賴作成萬里雲霄仕途

遠九天雨露

聖恩榮錢塘江上春風煖甍社湖中夜月明此去齶司
難久屈鹽梅即日用調羹

張煥

新恩不待戍瓜香民瘼纔瘳又促裝半載爲邦臨璧
社一朝分漕調錢塘雪漫鯨海吳天濶月送鷁舟淮
水長回首湖山千里隔春風吹恨滿甘棠

張文綱

春滿黃堂萬姓安忍聞中道促征鞍一鞭山色詩魂
壯半夜江聲客夢寒落：鷗盟淮月冷高：鵬路浙

雲寬宦情只在西湖上笑撚梅花帶雪看

崔裕

竹馬迎來半載餘政聲早已動 京都

天邊雨沐新春澤江上山迎舊 使車棠蔭愛心遺

甓社梅花清夢遶西湖此行小試 經綸手名覆

金甌看異除

李槃

半載承流善政新除書早已下

嚴宸移將甓社一輪月去照錢塘萬竈民水火相成功

滿世權衡若定政如神能調衆口均甘苦金鼎梅羹

待此人

許士權

數月秦郵草偃風 使軺又駐武林中八珍欲試

和羹手萬竈先施煮海功每爲苦辛懲利口自甘清

淡畏

天聰江梅盡與鹽相得惟有孤山香不同

樂府太常引

劉忠

少年南北快飛騰身到處有佳聲甓社化纔行又出

使餘杭故城 春風滿路堤邊楊柳難繫去留情何

處望 台旌泛千里孤舟月明



